

DOMENIE V DI PASCHE

Jutoris pe Liturgjie

Domenie, ai 10 di Mai dal 2020

Alore Gjesù ur vierzè la ment par lâ a font des Scrituris (Lc. 24, 45)

Vite - Bibie - Popul

pre Antoni Beline e une sô opinion di îr - par fânus rifleti vuê

* * *

***Al vâl ancje pal nestri popul e glesie:
Tal cantîr di Diu si partis simpri dai ultins***

Cjalant la storie de bande di Diu, o vin un mutîf in plui par sperâ. Se il stîl di Diu al è chel di sielgi i piçui e i meschins par meti in plene lûs la magnificence des sôs voris, il nestri popul cussì puar umanamenti e cussì pôc calcolât, al è il materiâl plui adat par jessi doprât da part di Diu.

O disarès, cu la Bibie in man, che nô o sin la malte e i modons plui induvinâts par fâ sù la citât di Diu. E chê che umanamenti e ven considerade une disgracie e une sorte di handicap, pai vôi di Diu e devente un titul di precedence, lui ch'al sledrose la logjiche e la realtât di chest mont metint i ultins in teste e sgnacant i prins in code (Mt 19, 30; 20, 16). Cirin di crodi di plui a lis sorpresis de storie e a la peraule di Diu.

Fortunât il popul che al è il Signôr il so Diu - par une leture sapienziâl de Bibie, p. 62.

* * *

La messe di cheste V Domenie di Pasche nus presente alc dai discors, des peraulis di Gjesù te ultime cene. O podarèssin dî, dal so Testament: il tesaur, compendi di une esperience di vite passade fra miseriis, levrôs, eretics, peçjadôrs, dissepui e persecuzions.

Tomàs e Filip a scoltin, come che o varessin fat noaltris, però ancje a domandin.

Al dîs Tomàs: Signôr, no savin là che tu vâs; cemût podino cognossi la strade?

Noaltris, a dî il vêr, o savin ce strade che al varès fat il Messie: chê dal Calvari di muart e di resurezion; però no savin dulà che Lui al vûl condusinus vuê; come che, testimonis i Ats dai Apuestui (che o stin leint o scoltant in chestis 50 zornadis di Pasche), nancje i Apuestui no savevin li che stavin lant. Di fat il Spirtu Sant al scugnive intervignî vonde spes par metiju in rie seont i plans di Diu.

E reste duncje par nô la domande: in chest coronavirus, fra lis glesiis desertis e messis e rosaris par television, cemût jo, persone, il gno popul, lis comunitâts cristianis, podino cognossi la strade di fâ? Domande no dome legjitime, in chescj grancj cambiaments, ma plui che necessarie par superâ la tentazion di restâ blocâts come la femine di Lot: si voltà indaûr a cjalâ e e diventà une colone di sâl (Gjen 19, 26).

La seconde domande e ven di Filip: I dîs Filip: Mostrinus il Pari e nus baste. Culi Gjesu al è une vore sempliç e sclet: Chel che mi à viodût me al à viodût il Pari. Gjesù di Nazaret, il fari (Mc 6, 3), al è la rivelazion di chel Diu che nissun no lu à mai viodût, come che nus dîs il preambul dal vanzeli di Zuan: Diu nissun no lu à mai viodût. / L'unigenit Diu, / ch'al è tal grim dal Pari, / propit lui nus al à pandût (Zn 1, 18).

Duncje la domande e cole e consolazion e pàs a puedin albergâ tal nestri cûr.

Ma cumò lassinsi cjapâ de antifone di jentrade:

Antifone di jentrade

cf. Sal 97,1-2

Cjantait al Signôr une cjante gnove parcè che il Signôr al à fatis robonis; al à palesade la sô justizie in face di ducj i popui, aleluia.

Si dîs Glorie a Diu.

Colete

Diu onipotent e eterni,
rifinîs di un continui in nô il misteri di Pasche
par che cul jutori de tô protezion a puedin rindi une vore
e rivâ a la gjonde de vite eterne
chei che tu ti sês indegnât di rinovâ cul sant batisim.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

At 6,1-7

A sielzerin siet oms plens di Spirtu Sant.

Probabilmentri Luche al semplifìche unevore ce che al pues sedi sucedût a Gjerusalem li che la comunitât dai eleniscj e domandave e e otignì une proprie autonomie. Moment tant impuartant se Luche al ripuarte i nons dai siet oms di buine reputazion, plens di Spirtu Sant e di sintiment.

Di notâ ancje che culî o assistin a un inizi di "glesie sinodâl" li che i Apuestui a aprovin ce che la semblee e à decidût. Il popul di Diu al sielç i siet e ur ai presentarin ai apuestui e lôr, dopo di vê preât, ur meterin lis mans sul cjâf.

Pape Francesc al disarès, tune imagine a lui cjare: une glesie li che la piramide dal faraon e je voltade cu la spice in bas e i pîts in alt; la comunitât te preiere e sielç intant che i socestants in chê sielte si sbassin a dâ une man. Di fat, tal Ream di Diu i prins a saran ultims e i ultims prins (cf. Mt 19, 30).

Dai Ats dai Apuestui

In chei dîs, biel che il numar dai dissepui al cresceve, al nassè un rusin dai eleniscj cuintri dai ebreos, par vie ch'a vignivin metudis di bande lis lôr veduis te spartizion di ogni dì. Alore i dodis a clamarin la semblee dai dissepui e ur diserin: «No va che nô o trascurin la peraule di Diu par stâ a dâ fûr robe. Pluitost, fradis, cjataitsi fûr fra di vualtris siet oms di buine reputazion, plens di Spirtu Sant e di sintiment e ur darin cheste incariche. Noaltris invece o restarin salts te preiere e tal predicjâ la peraule». La propueste i plasè a dute la semblee e a sielzerin Stieffin, om plen di fede e di Spirtu Sant, Filip, Procor, Nicanor, Timon, Parmen e Nicolau, proselit di Antiochie. Ur ai presentarin ai apuestui e lôr, dopo di vê preât, ur meterin lis mans sul cjâf.

E la peraule dal Signôr si slargjave simpri plui; il numar dai dissepui al cresceve un stragjo a Gjerusalem e ancje un biel trop di predis si jerin sotponûts a la fede.

Peraule di Diu.

SALM RESPONSORIÂL

dal Salm 32

Chest salm responsoriâl al interprete ben i sintiments che a podevin albergâ tal cûr de prime comunitât di Gjerusalem, cjapade de gjonde de resurezion di Crist, dal numar dai dissepui che al cresceve, peade a la peraule dal Signôr e a lis propriis sieltis in cussience, ma ancje timorose parcè che l'andament dai avveniments al prometeve sei ben che mâl.

I moments dal Covid-19 che o stin passant, nus fasin dî ancje a nô:

R. Voltiti viers di nô, Signôr: in te o metin la nestre sperance.

Se cjantât: Il cjant dai salms responsoriâi, p. 44.

O ben:

R. Aleluia, aleluia, aleluia.

Gjoldêt tal Signôr, int juste;
ai bogns ur sta di laudâlu.
Laudait il Signôr cu la citare,
cu la citare a dîs cuardis fasêti une cjante. **R.**

Parcè che la peraule dal Signôr e je juste
e fedele ogni sô vore.
Lui al ten pe onestât e pe dretece;
dal boncûr dal Signôr e je incolme la tiere. **R.**

Ve, il voli dal Signôr si poe sun chei che lu rispjetin,
sun chei che tal so boncûr a sperin,
par sfrancjâ de muart lis lôr vitis,
par tignîju in vite in timp di miserie. **R.**

SECONDE LETURE

1 P 2,4-9

Vualtris o sês la gjernazie sielte, i predis e i rê.

Cualchi zornade indaûr al è stât l'aniversari dal taramot dal 6 di mai dal 1976. Lis pieris sdrumadis, mans espertis e pietosis lis varessin tornadis a meti dongje come pieris sieltis pes gnovis cjasis e glesiis. Culî però Pieri nus cjacare di une piere di cjanton, sielte, preseade: Crist e nus invade a tacâsi daprûf di lui, piere vive, butade di bande dai oms ma sielte e preseade denant di Diu..... E al zonte: tant che pieris vivis, lassaiti doprâ par fâ sù une cjase spirituâl, par jessi predis sants, in mût di podê ufrî sacrificis spirituâi che Diu al à agrât midiant di Gjesù Crist.

Il taramot dal '76 al à pandût al mont intîr il valôr de nestre int; che la peste di vuê e puedi rindinus pieris vivis, cristianis, in ogni sorte di ben.

De prime letare di san Pieri apuestul

Benedets, tacaiti daprûf di lui, piere vive, butade di bande dai oms ma sielte e preseade denant di Diu. Ancje vualtris, tant che pieris vivis, lassaiti doprâ par fâ sù une cjase spirituâl, par jessi predis sants, in mût di podê ufrî sacrificis spirituâi che Diu al à agrât midiant di Gjesù Crist. Di fat al è scrit: “Ve che jo o met in Sion une piere di cjanton, sielte, preseade, e chel ch'al crôt in jê nol restarà malapaiât”.

Onôr duncje a vualtris ch'o crodês: ma par chei che no crodin “la piere che i muradôrs le vevin butade di bande e je diventade un cjantonâl, un clap che si inçopedisi e une piere ch'e fâs colâ”.

Lôr s'inçopedin parcè che no crodin a la peraule; al è il lôr distin. Vualtris invezit o sês la “gjernazie sielte, i predis e i rê, la int sante, il popul che Diu si è cuistât par ch'al conti lis grandis voris” di lui, che us à clamâts dal scûr a la sô lûs sflandorose.

Peraule di Diu.

CJANT AL VANZELI

Zn 14,6

R. Aleluia, aleluia.

Jo o soi la strade, la veretât e la vite, al dîs il Signôr:
nissun nol va al Pari se no midiant di me.

R. Aleluia.

VANZELI

Zn 14,1-12

Jo o soi la strade, la veretât e la vite.

Inte cjase di gno Pari a 'nd è tant puest. *I esegjetis ur dan significâts diferents a chestis peraulis. Seont cualchidun, Gjesù si riferis a la comunitât cristiane che si formarà dopo de sô resurezion e che e deventarà la cjase di gno Pari. Li, a 'nd è tant puest e ducj e ognun a varan un lôr puest.*

E je superade la nestre mentalitât di glesie li che il plevan al veve in man dut; invezit, ognun al à il dirit-dovê, a motîf dal Batisim, a un so puest e a une sô responsabilitât. Di fat, un al à vude dal Spirt peraula di sapience... un altri di sience... un altri il don di vuarî... come che nus spieghe ben S. Pauli te Prime letare ai Corints tai cjapitui 12 - 14.

Come che tal clime dal coronavirus, ognun al à di sintîsi responsabil di sè e dal prossim evitant la fole, mantignint lis distancis, lavant spes lis mans... cussì une simile responsabilitât o varessin di sintîle come cristians ancje te glesie li che ognun al à vude la manifestazion dal Spirt pal ben di ducj (1 Cor 12, 7).

Dal vanzeli seont Zuan

In chê volte, Gjesù al disè ai siei dissepui: «Il vuestri cûr nol à di conturbâsi. Crodêt in Diu e crodêt ancje in me. Inte cjase di gno Pari a 'nd è tant puest, senò us varessio forsît dit ch'ò voi a preparâus un puest? E cuant che o sarai lâf e us varai preparât un puest, o tornarai e us cjaparai sù cun me, par ch'ò sedis ancje vualtris là ch'ò sarai jo. E là ch'ò voi, vualtris o cognossês la strade».

I dîs Tomâs: «Signôr, no savin là che tu vâs; cemût podino cognossi ancje la strade?». I dîs Gjesù: Jo o soi la strade, la veretât e la vite. Nissun nol va al Pari se no midiant di me. Se mi vessis cognossût me, o cognossaressis ancje gno Pari, e za di cumò lu cognossês e lu vês viodût». I dîs Filip: «Mostrinus il Pari e nus baste». I dîs Gjesù: «Dopomai ch'ò soi cun vualtris e tu, Filip, no tu mi âs in mò no cognossût? Chel che mi à viodût me al à viodût il Pari. Cemût fasistu a dî: Mostrinus il Pari? No crodistu che jo o soi tal Pari e che il Pari al è in me? Lis peraulis che jo o dîs, no lis dîs di cjâf gno; il Pari ch'al vîf in me al fâs lis sôs oparis. Crodêtni: jo o soi tal Pari e il Pari al è in me. Crodêt almancul in gracie des mêis oparis. In veretât, in veretât us dîs: Chel ch'al crôt in me, al fasarà ancje lui lis oparis ch'ò fâs jo e int fasarà ancje di plui grandis, parcè che jo o voi li dal Pari». Peraule dal Signôr.

Si dîs O crôt.

Su lis ufiertis

Diu, che pal incuintri sant di chest sacrifici
tu nus fasis vè part de tô divinitât uniche e infinide,
danus, par plasê, di testemoneâ cuntune vite degne
la tô veretât ch'ò vin cognossude.

Par Crist nestri Signôr.

Antifone a la comunion

Zn 15,1.5

Jo o soi la vît vere e vualtris i cjâfs,
al dîs il Signôr;
chel ch'al reste in me e jo in lui,
chel al bute une vore, aleluia.

Daspò de comunion

Signôr, ti prein, cjale di bon voli il to popul
e, daspò di vèlu inscuelât cui misteris dal cîl,
dai di passâ de viere a la gnove vite.

Par Crist nestri Signôr.

* * *

Cjants pal timp di Pasche

- Crist nus da la sô lûs, *n. 158*;
- Victimae paschali laudes, *n. 159*;
- I cristians a cjantin laude, *n. 160*;
- Aleluia... O filii et filiae, *n. 161*;

- Sta legre, sante Glesie, n. 162;
- Christ ist erstanden, n. 163;
- Crist al è in vite, n. 164;
- Cristo risusciti, n. 165;
- Grosser Gott, n. 166;
- Al Agnel sacrificât, n. 167;
- Hvala veçnemu Bogu, n. 168;
- Te lodiamo Trinità, n. 169;
- Laudate Dominum n. 170;
- O sin resurîts a la vite, n. 171;
- Benedete la zornade, n. 172;
- Il nestri Redentôr, n. 173;
- Si cjanti al Pari laut in cîl, n. 174;
- Nei cieli un grido risuonò, n. 175;
- O Cristo, soldi Pasqua, n. 176.

Salm 22 : Il Signôr al è il gno pastôr, n. 241;

“ 94 : Vignît, batin lis mans al Signôr, n. 256;

“ 80 : Gjoldêt in Diu nestre fuarce, n. 256;

“ 92 : Il Signôr al regne, n. 258;

“ 97 : Cjantait al Signôr une cjante gnove, n. 261;

“ 113a : Cuant che Israel dal Egjit al è jessût, n. 265;

“ 113b : No a nô, Signôr, no a nô, ma al to non dai glorie, n. 266.

Tal libri Hosanna, si puedin cjatâ ancjemò altris cjants e salms adats al timp di Pasche.

* * *

Inte cjase di gno Pari a 'nd è tant puest

I dîs Tomâs: cemût podîno cognossi la strade?». I dîs Gjesù: Jo o soi la strade.

(.....) *Quale è "la via" ?*

Gesù si spiega: percorrerà egli stesso per primo il cammino: poi, una volta compiuta la sua missione, tornerà e prenderà con sé i discepoli, infonderà loro il suo coraggio, così saranno resi capaci di seguire i suoi passi.

In questa prospettiva diviene chiara anche la questione dei "molti posti nella casa del Padre". Sono molti i modi in cui si concretizza il dono della propria vita.

I molti posti altro non sono che i diversi "ministeri".

Fino al Concilio Vaticano II i laici non erano considerati membri attivi della Chiesa: non partecipavano all'Eucarsistia ma "assistevano"; non celebravano la riconciliazione, andavano a "ricevere" l'assoluzione. Erano spesso spettatori inerti di ciò che i preti facevano.

Oggi abbiamo capito che ogni cristiano deve essere attivo, non per la carenza di preti, ma per il fatto che ognuno ha un compito da svolgere all'interno della comunità.

(.....) *Il brano del Vangelo è un invito alla verifica della vita comunitaria: quale è la percentuale dei membri attivi? Ci sono degli impegni che nessuno vuole assumere? Ci sono dei "disoccupati"? Perché?*

Fernando Armellini

* * *

- * *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- * *Il cjant dai salms resposoriâi, Ed. Glesie Furlane, 2012.*
- * *50 corâi de cristianitât todescje voltâts par furlan, ed. Glesie Furlane, 2016.*
- * *Il libri des riflessions di pre Antoni al è: pre Antoni Beline, Furtunât il popul che al è il Signôr il so Diu - par une leture sapienziâl de Bibie, Edizion "La Patrie dal Friûl", 1991.*
- * *Par domandâ chescj libris scrivêt a info@glesiefurlane.org*